

Promé lustro di fayecimento di Betico Croes

ORANJESTAD - Awe ta 5 añu pasá cu den promé oranan di mainta di dia 26 di November, cu Aruba henter a ser conmovi cu e noticia cu Betico Croes a fayecé na Hulanda.

Betico Croes no a sobreviví e accidente cu el a haña bispo di Año Nobo, esta dia 31 di December 1985. For di e dia ey, Betico a keda practicamente den coma. Despues di a recibí tratamiento medico na Aruba, a ser recomendá pa hiba Merca y despues Hulanda y semper e speranza tabata tey, cu e lo por a recuperá di e slanan cu el recibí.

Pero Todopoderoso a dicidí otro y a dicidí di yamé den su Reino, y manera a ser bisá, Betico Croes a cumpli cu su mision pa cual el a bini mundo, esta logra Status Aparte di Aruba, loke lamentablemente e mes no por a biba pa miré, cu awe tambe ta cumpli 5 añu.

Awe Betico físicamente no ta hunto cu nos mas, pero dia pa dia e ta den memoria di cada uno di nos na Aruba, y tur dia ainda, por recordé pa su actividadnan y sigur su palabranan cu a bira palabranan celebre.

Pero awe su lucha ta sigi ta ehempel na Antiyas, cu nunca kier a kere den e lucha di Status Aparte. Na Hulanda y varios otro pais cu a conocé su lucha, ta sigi tin Betico Croes como ehempel, cu perseverancia bo ta logra bo meta.

Gilberto François Croes a nace dia 25 di Januari 1938, maestro di profesion, pero bida a haci dirigente di e pueblo aki y a bira yiu ilustre di e pueblo aki. Pero semper y cuando a keda Betico pa tur hende.

Betico a drenta mundo politico na 1967. Na mesun aña ey, el a bira miembro di Eilandsraad y Diputado di Enseñanza. Despues a surgi diferencianan fundamental den AVP, el a kibra cu e partido aki y a fundá Movimiento Electoral di Pueblo.

Cu e partido aki, el a sigi cu e lucha pa Aruba bira soberano, e Status Aparte tan anhelá pa e pueblo aki. E lucha aki no a bai facil. Un di e momentonan ta dia 24 di April 1983, ora cu el a keda mortalmente heridá y un biaha mas pueblo a reza suplica na Todopoderoso pa no hibé ainda, pasobra ainda su mision no a terminá.

Betico mes, despues di e hecho aki, a bisa cu poco poco e lo bai na retira for di actividadnan politico, una bez cu e mira e anheló di pueblo cumplí. Pueblo no a acepta esey y asina den e campaña electoral a lansé como candidato pa e bira e promé Promé Minister di e Pais Aruba. Lamentablemente pueblo no a dún suficiente voto pa logra esaki.

Riba promé lustro di fayecimento di Betico Croes hopi ta recordá su soñonan cu nunca el a realizá.



Recordabo ... conmemorabo

Esey ta tur locual cu a resta nos

Cuanto nos ta faltabo ...

Oh papy ... cuanto nos ta añorabo

Relámpago ... abrupto ... y sin consuelo, bo

Despedida tabata.

Ainda ... cu dolor profundo ... cu incertidumbre

Nostalgicamente nos ta "interroga"

Dicon? ... Dicon?!!!

Oh omnipotente Dios, cuidé y guié p'é encontrá bo eterna luz.

Bo ta sosegando, bo ta na paz den reino di Señor, pero

Oh nos papy stimá ... ta nos plegaria, cu pa nos,

I eternamente bo wowonan lo briya pasó

Papy ...

Apesar di bo ausiencia ... den nos curazon, na nos lado,

den nos mente, ... inseparable nos lo ta,

Protegiendo nos, guiando nos ... stimabo nos ...

Y iluminando nos mente ... eternamente

Den number di mi mama Glenda, mi rumannan Glenbert, Gilberto jr., Glendeline y Guisette Croes.

Inicio di e lucha

E lucha pa Status Aparte, bao di direccion di Betico Croes a cuminsá na 1972, ora cu durante conferencia di Comision di Reino na Surinam, partidonan di Antiyas a boga pa un federacion di 6 isla cu base di "one man one vote", cu Betico a bandoná e reunion aki y dicidí di consulta di pueblo.

Na e mesun aña aki, un delegacion di Aruba a viaha pa Hulanda pa convence Hulanda cu Aruba kier ta soberano. Despues di esaki, a sigi varios manifestacion di pueblo, cu a sostene Betico Croes den su lucha.

Un di nan tabata dia 18 di Maart 1973 den Wilhelmina Stadion pa demostra PRLamentarianan Hulandes, cu pueblo ta serio den nan demanda.

Aki claramente a keda demostra un biaha mas, un di e famoso frase nan di Betico Croes, "Vox Populi, Vox Dei".

Un di e otro actividadnan cu ta keda den historia, ta e dianan scur di Augustus 1977. Como partido di mas grandi di Aruba, MEP a ser laga for di formacion di gobierno central y tabata PPA cu e otro partidonan politico di Antiyas, a trata na boycotea e deseo di Aruba.

Betico tabata sa di a mobilisa e pueblo cu cooperacion di varios gremio y a inicia un protesta masal exigiendo pa PPA sali for di gobiernu.

A forma un delegacion, demostrando un Aruba uni, cu a viaha pa Hulanda y Hulanda a priminti su cooperacion y a pone gobiernu central sinta na mesa y a logra e afamado Protocol di Willemstad.

Tabata pa promé biaha cu un parlamentario Arubano/Antiyanu a dirigí palabra den Tweede Kamer, cu a duna fruta na inicio di deliberacionnan pa Aruba sali for di e constelacion Antiyanu. MEP un biaha mas a haña confianza di pueblo pa drenta gobiernu central na 1984, unda MEP a institui e cartera nobo pa prepara Status Aparte di Aruba.



Na Mei 1985, Parlamento Hulandes a acepta pa bini cambio di Statuut, unda Aruba a haña garantia cu dia 1 di Januari 1986, Aruba lo haña su Status Aparte.

E Status Aparte, manera ya mencioná, Betico Croes mes no a haña oportunidad di disfruta di dje, ya cu dia 31 di December 1985, algun ora di mira con bandera di Aruba lo ser

hisá y himno lo ser cantá di un Aruba liber, el a sufri e accidente cu despues a costa su bida.

Awe conmemorando promé lustro di fayecimento di Betico Croes, por bisa ainda pueblo ta yora e yiu di tera aki. Semper y cuando recordando e palabranan cu tambe a bira historico, "si mi cai na caminda, gara e bandera y sigi cu e lucha". □

